



考

卷九

洪武

一

口問



較勝負爾心以為何如

大祀南郊禮成諭侍臣事天之寶○躬耕籍田遣官
享先農禮成宴羣臣於壇所○禁采銀礦

二月大將軍馮勝等襲破虜騎於慶州

勝等兵至通州遣邏騎出松亭關聞虜騎有屯慶
州者乃遣右副將軍藍玉乘大雪將輕騎往襲之
殺其平章果來擒其子不蘭奚并獲人馬而還

浙江布政使司直隸蘇州等府縣進魚鱗圖冊
御註書洪範成○焚錦衣衛刑具

三月大將軍馮勝等率師出松亭關築大寧寬河會州富峪四城遂提兵駐於大寧○夏四月命江夏侯周德興置福建緣海防倭衛所

五月遣使齎勅諭西平侯沐英等

勅曰近御史李原名歸自平緬朕聽其所陳知百夷誦詐之詳雖百千萬言無一言可信由是觀之蠻夷反欲窺伺中國爲我邊患符至可卽葺壘金齒楚雄品甸及瀾滄江中諸道須高城深池固其營柵多置火銳爲守備賊來勿輕與戰相機乃動

定親王歲
祿五萬石

六月大將軍馮勝等進師駐金山

鎮撫張允恭以所送乃刺吾至馮勝營勝復遣人送入納哈出所馮勝等進師駐金山之西是時乃刺吾還至松花河見納哈出納哈出大驚曰吾謂汝死矣今日乃復得相見執手勞問殷勤乃刺吾因諭納哈出朝廷所以送還之意納哈出喜卽遣其左丞劉探馬赤叅政張德裕隨使者張允恭等至勝軍獻馬欲因以覘我勝遣人送赴京師旣而乃刺吾備以朝廷撫恤之恩語其衆由是虜衆多

有降意

大將軍馮勝率師踰金山，納哈出降，遂班師。

初，納哈出分兵爲三營：一曰榆林深處，一曰養鴛莊，一曰龍安一禿河。輜重富盛，畜牧蕃息。虜主數招之不往。及是大將軍逼之，納哈出計無所出，乃刺吾因勸之降。納哈出猶豫未決。大將軍馮勝遣馬指揮往諭之。納哈出乃遣使至大將軍營，陽爲納款，而實覘兵勢。勝遂遣藍玉往一禿河受其降。虜使見大將軍勝，還報。納哈出聞之，乃指天嘖嘖。

曰：天不復與我有此衆矣。遂率數百騎，自詣玉納降。玉大喜，出酒與之飲，甚相歡。納哈出因酌酒酌玉。玉請先之。納哈出卽飲訖，復酌以授玉。玉解衣以衣之，謂曰：請服此而後飲。納哈出不肯服。玉亦持酒不飲，爭讓久之。納哈出取其酒澆地，顧其下咄咄語，將脫去。時鄭國公常茂在坐，其麾下有趙指揮者，解胡語以告茂。直前縛之。納哈出大驚起，欲就馬。茂拔刀砍之，傷臂不得去。都督耿忠遂以衆擁之見勝。納哈出所部妻子將士凡十餘萬在

松花河北聞納哈出被傷，遂驚潰。餘衆欲來追，勝遣前降將觀童往諭之。於是其衆亦降，凡四萬餘。納哈出有二姪，不肯降，勝復遣人諭之，乃折弓矢擲於地，亦來降。勝以禮遇納哈出，復加慰諭，令耿忠與同寢食。遣使奏捷於京，仍奏常茂驚潰虜衆，遂班師。上遣使勅諭勝等曰：劉鎮撫至，備言軍中事。納哈出入營，大軍既定，惟在處置得宜。其本管將士，令各照原地方居住，順水草，以便牧放。擇膏腴之地，以便屯種。如北平、潮河、川大寧、金寧口。

南口北舊居之人，立成衛分，與漢軍雜處。若瀋陽崖頭、閭山願居者，亦許與遼東軍叅住，從便耕牧。務令人心安樂，不致失所。將士之數，具實以聞。朕將犒勞之，常茂驚潰虜衆，卽令人械赴京。

秋七月，命以太公從祀帝王廟，去武成王號，罷其舊廟。

上曰：太公周之臣，封諸侯。若以王祀之，則與周天子並矣。加之非號，必不享也。

真臘國遣使貢象五十九隻，香六萬斤。暹羅國遣使

貢胡椒一萬斤，蘇木十萬斤。○八月，遣使戒諭北征諸將，召馮勝還，以藍玉行總兵官事。

馮勝械常茂至關，茂勝之壻也。勝每於衆中卑折之，茂不能堪，出不遜語。勝啣之，及納哈出降，而虜衆驚潰，勝欲自解，故歸咎於茂而奏之。茂既至陳，所以降納哈出之故。上曰：如爾所言，勝亦不得無罪。命收其總兵官印，召勝還，而令永昌侯藍玉行總兵官事。

九月，故蒙古降將納哈出至京，封海西侯。

其所部官屬悉賜衣服冠帶，有差第其高下，授以指揮千百戶，俾各食其祿而不任事，分隸雲南兩廣福建各都司以處之。

安置鄭國公常茂於廣西龍州。○詔以永昌侯藍玉

為驚潰虜衆

為征虜大將軍，延安侯唐勝宗為左副將軍，武定侯郭英為右副將軍，率師進討殘胡。○冬十月，封朱壽為舳艫侯，張赫為航海侯。○置北平都指揮使司於大寧。○詔建歷代忠臣廟于鷄鳴山。

命宋國公馮勝建第鳳陽，奉朝請。○十一月，命普定

侯陳桓靖寧侯葉昇總制雲南諸軍於定邊姚安等處立營屯種以俟征進○十二月大誥武臣

上以中外武臣多出自戎伍罔知憲典故所爲往往麗法乃親製大誥三十二篇以訓之

戊辰二十一年春正月召前諸城知縣陳允恭於雲南

上諭吏部臣曰爲國以任人爲本作姦者不以小才而貸之果賢者不以小疵而弃之陳允恭前任諸城以簿書之過謫戍雲南比有言其治縣時能

愛民夫長民者能愛民雖有過可用也於是召允恭還復其官

以浙江道監察御史凌漢爲右副都御史

漢鞫獄平恕人有感漢者遇諸途邀漢飲厚報以金漢告曰子罪當爾律有定法非我私子酒飲而金不可受固却之時有廉得其事以聞上嘉之而用焉

詔以歷代名臣從祀帝王廟

上曰古之君臣同德者終始一心載在史傳萬世

不泯國家祀典必合公論若宋趙普負太祖爲不忠不可從祀元臣四傑木華黎爲首不可以其孫從祀而去其祖可祀木華黎而罷安童旣祀伯顏其阿朮亦不必祀如漢陳平馮異宋潘美皆節義兼善始終可從廟祀於是定以風后力牧皐陶夔龍伯夷伯益伊尹傳說周公旦召公奭太公望召虎方叔張良蕭何曹參陳平周勃鄧禹馮異諸葛亮房玄齡杜如晦李靖李晟郭子儀曹彬潘美韓世忠岳飛張浚木華黎博爾忽博爾木赤老溫伯

顏凡三十有七人

定歷代帝王廟制

初歷代帝王廟五室自伏羲至元世祖凡十七帝至是去隋文帝凡十六帝爲五室中三室居三皇五帝三王如舊最東一室則漢高祖光武唐太宗最西一室則宋太祖元世祖從祀名臣凡四壇東廡第一壇九人第二壇十人西廡第一壇九人第二壇九人建於鷄鳴山之陽

故蒙古四大王來降命隨西平侯沐英戍守雲南

遣使勅諭大將軍藍玉左副將軍唐勝宗右副將軍
郭英

勅曰今歲四月十五日夜月食五月朔日食此天
戒也不可不謹卿等統兵在外宜嚴號令肅部伍
遠斥埃以防不虞

三月策試舉人九十七人於奉天殿擢任亨泰爲第

一○令諸儒撰疑信論

上召考試官陳宗順等坐武英門賜食諭之曰今
日觀利子鄰子竊鐵之事因思人之信疑皆生於

心。信。心。常。出。於。忠。厚。疑。心。必。起。於。偏。私。君。之。於。臣。
好。而。信。之。讒。言。雖。至。而。不。入。惡。而。疑。之。毀。謗。不。召。
而。自。來。苟。能。以。大。公。至。正。之。心。處。已。待。人。則。自。無。
獨。信。偏。疑。之。私。

遣使勅諭大將軍藍玉

詔申國公鄧鎮定遠侯王弼南雄侯趙鏞東川侯
胡海等往從征虜大將軍藍玉北征遣使齎勅諭
藍玉等曰邇者故元司徒阿迷來降朕察其事情
知虜心惶惑衆無紀律度其勢不能持久卿等宜

整飭士馬倍道兼進直抵虜庭覆其巢穴其衆若
降附撫慰南來毋失事機以孤朕望

百夷思倫發叛西平侯沐英討平之

先是雲南平緬蠻叛結砦于摩沙勒總兵沐英遣
都指揮審正擊破之至是思倫發悉舉其衆號三
十萬象百餘隻復寇定邊欲報摩沙勒之役勢甚
猖獗新附蠻夷陰相連結咸蓄異心西平侯沐英
知夷人反側乃謂衆曰吾與若等約有功者必賞
退衄者必斬於是將士皆奮勇欲戰賊悉衆出營

結營以待其酋長把事招綱之屬皆乘象象皆披
甲背負戰樓若闌楯懸竹筒於兩旁置短槊其中
以備擊刺陣旣交羣象衝突而前我軍擊之矢石
俱發聲震山谷象皆股栗而奔指揮張因千戶張
榮祖率騎士乘勝追奔直擣其柵寨破之遂縱火
焚其寨烟焰張天還以兵邀擊之殺傷甚衆賊黨
有昔刺者最號驍勇復率衆死戰英乘高望見我
軍左隊小却卽傳令馳斬隊將隊將懼奮呼突陣
衆隨之無一不當百賊衆大敗斬首三千餘級俘

萬餘人象死者過半，生獲三十有七，餘賊皆潰。我師追襲之，賊連日不得食，死者相枕籍。思倫發遁去，英遂遣使奏捷，還師雲南。所過城邑，百姓爭持牛酒出郊迎勞，英慰諭而遣之。

夏四月，大將軍藍玉師至捕魚兒海，大破故蒙古主愛猷識理達臘子脫古思帖木兒走之。自是殘元之孽不復能振矣。

藍玉等率師由大寧進至慶州，聞虜主脫古思帖木兒在捕魚兒海，從間道兼程而進，至百眼井，去

捕魚兒海尚四十餘里，哨不見虜，欲引兵還。定遠侯王弼曰：「提十餘萬衆，深入虜地，今略無所得，遽言班師，徒勞師旅，將何以復命？」玉深然之。戒諸軍皆穴地而爨，毋令虜望見烟火。師遂進至捕魚兒海南，飲馬，偵知虜主營在海東北八十餘里。玉以弼爲前鋒，直薄其營。虜始謂我軍乏水草，必不能深入，不設備。又大風揚沙，晝晦，軍行虜皆不知。虜主方欲北行，整軍馬皆北向。忽大軍至，其太尉蠻子率衆拒戰，敗之，殺蠻子及其軍士數百人。其衆

遂降虜主脫古思帖木兒與其太子天保奴知院
捏怯來丞相失烈門等數十騎遁去。玉率精騎追
之，出千餘里，不及而還，獲其次子地保奴等六十
四人及故太子必里禿妃并公主等五十九人。其
詹事院同知脫因帖木兒將逃，失馬竄伏深草間，
擒之。又追獲吳王朶兒只代王達理麻平章八蘭
等二千九百九十四人，軍士男女七萬七千三十
七口，得寶璽圖書牌面金印銀印等，馬牛羊俱十
萬餘，遣人入奏，遂班師。

乙酉，五色雲見。

東川蠻叛，命傅友德爲征南將軍，沐英爲左副將軍，
陳桓爲右副將軍，曹震爲左叅將，葉昇爲右叅將，統
領馬步諸軍討之。

友德等旣受命，復遣使齎勅諭之，曰：東川芒部諸
夷種類雖異，而其始皆出於囉囉厥後子姓繁衍，
各立疆場，乃異其名曰東川烏撒芒部祿肇水西
無事則互起爭端，有事則相爲救援，須預加防閑，
嚴整師旅，使彼不得肆其奸謀。又曰：其地山勢險

峻道路崎嶇林菁深遠其人與猿猴無異大軍一至竄入林藪猝難捕獲宜且駐兵屯種待以歲月然後可圖也

海西侯納哈出卒命其子察罕襲爵改封鄱陽侯大將軍藍玉遣人送所獲故蒙古主次子地保奴至京師賜鈔居之琉球

玉遣人送虜主次子地保奴及后妃公主等至京地保奴及后妃獻金印金牌賜鈔二百錠命有司給第宅廩餼俾就居京師既而有言玉私元主妃

事上怒曰玉無禮如此豈大將軍所爲哉元主妃聞之惶懼因自盡由是地保奴有怨言上聞之曰朕初以元世祖居主中國時有恩及民不可無嗣嘗與儒臣議欲封地保奴以盡待亡國之禮彼乃如此豈可以久居內地於是遣使護送居琉球仍厚遺資遣之

八月征虜大將軍永昌侯藍玉等還朝

上謂玉曰爾率將士北征功最大然虜主妃來降不能遇之以禮乃縱欲汗亂又嘗恃勞遣人入朝

規伺動靜此豈人臣之道哉今憫爾功勞屈法宥爾爾其率德改行以慎厥終玉頓首謝於是論功行賞賜玉白金二千兩鈔一千錠文綺五十疋左副將軍延安侯唐勝宗右副將軍武定侯郭英白金一千兩鈔四百錠文綺一十疋餘各賜白金鈔文綺有差

宴征北諸將于奉天殿

上悅賦平胡詩二章命羣臣和之

御製論武臣勅頒之將士

越州土酋阿資叛命西平侯沐英會穎國公傅友德討平之

初阿資之遁也揚言曰國家有萬軍之勇而我地有萬山之險豈能盡滅我輩英乃請置越州馬隆二衛扼其衝要又分兵追捕至是勢窮遂降景川侯曹震靖寧侯葉昇領兵分討東川叛蠻之平詔更定歲貢生員例

府學歲一人州學二歲一人縣學三歲一人進封永昌侯藍玉為涼國公

玉征北還論功行賞擬封玉梁國公適有發其私
元主妃者上聞大怒事中止至是念其勞改封
涼國公仍鐫是過于券

已巳二十二年正月以秦王為宗人令

中書庶吉士解縉上封事論時政

縉吉水人以二十一年進士選中書庶吉士上封
事論時政剴切萬言其略曰陛下進人不擇於
賢否授職不量於重輕建不為君用之法取之
盡錙銖置朋奸罔上倚法為奸之條用之如泥沙

陛下誠信有間用刑太繁每多自悔之時輒有無
及之歎律以人倫為重乃有給配夫婦之條聽
之於不義恐傷節義之化太常非俗學可肄官
妓非人道所為釋老之壯者宜出之使復人倫
經呪之妄者悉火之以杜俗惑治曆申播種
之時不用建除之謬陛下天資清高而學問不
充善端間發而心學無素典師取寶真偽莫明
神僊徵應誕謾莫信申明旌善之亭徒為虛設
藍田呂氏鄉約義門鄭氏家範可以頒行祀

天宜復掃地之規。尊祖當備七廟之制。奄寺宦官命掃除。公卿子弟敦賢達。勅有司課弓手。教民兵習射於農隙。茶椒泉絲既稅于所產之地。又稅於所過之津。何其奪民利之密也。古時有書院遺基。學田舊業。宜興復而廣益之。監生進士多困州縣。孝廉人才驟歷華要。椎埋負販者。冠裳赫奕。賢者羞爲等列。以貪婪苟免爲得計。以廉潔受刑爲飾詞。故有無錢工役無盤纏。鬻勝官人沒商量之謠。宜任用忠良。弗任喜怒。生殺。

緝封事皆治平良規。聖祖能容之。且愛護而玉成之恩。猶父子非常之遇也。

遣行人齎勅旌温州府平陽縣知縣張礎

勅曰。朕惟郡守縣令。其職惟在愛民。邇年有司任非其人。往往與軍衛交通。誅求朘剝。重困吾民。乃者通政司言浙江金鄉衛。因造軍器。意在擾民。爾温州府平陽縣知縣張礎。執法不從。具奏以聞。朕深嘉歎。特遣使以鈔三十錠。內酒一封。往勞以旌爾功。

三月命征南將軍穎國公傅友德率二十四將軍分駐湖川防西南諸夷

遣使命領國公傅友德等還軍分駐湖廣四川衛所操練諭友德等曰西南蠻夷自昔號稱難服所以然者其高山深林草木叢密夏多霧雨地氣蒸溼蛇虺蚊蚋之毒隨處而有人入其境不服水土則生疾疢所以功多不就今得爾報已平東川降阿資大勢已定然諸蠻夷易變生亂朕恐大軍一回彼復跳梁嘯聚豈不重勞吾將士乎今且還

軍分駐要地一以休息士卒一以控制夷蠻使至爾等一如所諭

五月癸巳置泰寧福余朵顏三衛

遣使齎勅往諭故元遼王阿禮失里等曰昔者二百年前華夷異統勢分南北奈何宋君失政金主不仁天擇元君起于草野戡定朔方撫有中夏混一南北逮其後嗣不君于是天更元運以付于朕自卽位來今二十餘年爾阿禮失里等知天命有歸率衆歸附朕甚嘉焉朕每於故元來歸臣民悉

加優待。况爾本元之親屬者乎。今特於泰寧等處立泰寧福余朵顏三衛。以阿禮失里等爲泰寧衛指揮。塔賓帖木兒爲指揮同知。海撒男答奚爲福餘衛指揮同知。脫魯忽察兒爲朵顏衛指揮同知。各領所部以安畜牧。

狼洞黃平蠻作亂。穎國公傅友德討平之。置興隆衛。隸貴州都指揮使司。○征南將軍穎國公傅友德有疾。命還京。尋召從軍諸將皆還。○秋七月。故蒙古部虜也速迭兒弒其主脫古思帖木兒而立坤帖木兒。

○八月更定大明律。○禁武臣預民事。徵趙撝謙爲瓊州教授。

撝謙雅追古學。探造化之原。嘗與修正韻。徵爲是官。作瓊臺布學範。六書本義。聲音文字。造化經綸。圖說俱手錄。以授教。蠻俗自茲嚮風。瓊崖四州稱爲趙夫子。丘瓊山出其門下。

冬十月。西平侯沐英自雲南來朝。錫宴賜金遣還鎮。

安南黎季犛弒其主陳日焜。○論侍臣興治之要。上謂侍臣曰。興治之要當進君子。退小人也。兵部

尚書沈縉對曰。君子小人未易識。上曰。獨行之士。不隨流俗。正直之節。必異庸常。譬如良玉委於污泥。其色不變。君子雜於衆人。德操自異。何難識也。○翰林學士劉三吾言。南北方俗不同。有可以德化。有可以威制。上曰。地有南北。民無兩心。帝王一視同仁。豈有彼此之間。三吾愧服。○上退朝。與侍臣論及守成之道。上曰。人常慮危。乃不蹈危。常慮患。乃不及患。車行於峻坂。而仆於平地者。慎於難。而忽於易也。保天下亦如御車。雖治平。何

可不慎。

徵士梁寅卒。

寅家貧力學。一時名士多與之交。爲元集慶路訓導。避亂隱居。上徵名儒修文。寅與焉。時以禮樂制度。分爲三局。寅在禮局。討論精審。諸儒推服。書成。授以官。以老病固辭。四方士多從之。學稱爲梁五經。

高麗幽其主。禡立禡子昌。

庚午二十三年春正月。熒惑入南斗。

詔燕晉王分道伐虜。○遣鳳翔侯張龍等往雲南置驛傳。

高麗復廢其主昌立王瑤權國事。

高麗遣使來言國王王昌非王氏後實辛旽子禰之子國中人民多不信服故別求王氏宗親定昌院君王瑤迎立嗣位以續王氏之後伏望朝廷允所請。上諭禮部尚書李原名曰高麗限山隔海其人多詐若果爲本國人民所推亦聽其自爲倘陰謀詐立一旦變更盡爲虛妄必將禍起不測皆

自取也爾且備咨其國人知之。

二月考定王國合祀山川諸神。

詔覓仙人張三丰

三丰魁偉美髯寒暑一衲或處窮僻或遊市井浩浩自如。有問之者終日不答。與論三教經書則吐辭滾滾皆本道德忠孝每事輒先知之所啖斗升輒盡或辟穀數月自若也。或隆冬臥雪中齟齬如常時詠揚州瓊花云。璚枝玉樹屬仙家未識人間有此花。清致不沾凡雨露高標猶帶古煙霞。歷年

既久何曾老舉世無雙莫浪誇便欲載回天上去
擬從博望借靈槎蓋以自況也

以廣東龍川知縣陳敬爲吏部侍郎

燕王率師出古北口征虜穎國公傅友德等以所部
從○申定官民服飾○三月燕王率師至迤都故蒙
古太尉乃兒不花丞相咬住忽哥赤知院阿魯帖木
等皆降

先是王師既出古北口文皇北臨塞諭諸將曰
吾與諸將軍受命提兵沙漠掃清胡虜今虜無城

郭居止其地空曠千里行師必有耳目不得其所
難以成功諸將皆諾卽發騎哨得虜跡知乃兒不
花等駐廬帳於迤都遂進兵適大雪諸將欲止

文皇囑曰天大雪虜必不虞我至宜乘雪速進遂
抵迤都隔一磧虜不知也乃先遣指揮觀童徑詣
虜營觀童與乃兒不花有舊至卽相抱持而泣倉
卒之頃各師已壓虜營虜衆大驚乃兒不花等欲
上馬走觀童諭以文皇親至毋恐乃兒不花素
聞文皇大威德遂不去觀童引之來見文皇

且降辭色以待之，卽賜之酒食，令醉飽，慰諭遣還營。虜喜甚，過望遂無遁意。將至營，又復召來。如是者三。於是悉收其部落及馬駝牛羊而還。遣人報捷京師。

施南忠建二宣撫司，蠻叛命涼國公藍玉討定之。○五月，遷楊靖爲刑部尚書，沈縉爲工部尚書，趙勉爲戶部尚書，秦達爲兵部尚書。令今後在京官三年皆遷調。○江南北海溢。○河決河南。太師李善長自殺。

虞部郎中王國用上書訟公冤曰：竊見太師善長與陛下同一心，出萬死以得天下，爲勲臣第一。生封公，死封王，男尚公主，親戚皆被寵榮，人臣之分極矣。志願足矣，天下之富貴無以復加矣。而今謂其欲佐胡，惟庸者揆之事理大謬。不然，善長於惟庸則姪之親耳。於陛下則子之親也。使善長佐惟庸成事，亦不過勲臣第一而已矣。太師國公封王而已矣。尚主納妃而已矣。豈復有加於今日之富貴者乎。當元之季，欲爲此者何限，莫不身爲

葬粉身絕宮污、僅保首領者幾人哉、凡爲此者、必有深讐、急變大不得已、未有平居晏然、都無形迹而忽起此謀者、此理之所必無也、若謂天象告變、大臣當災則殺人、以應天象、夫豈上天之意哉、今不幸已失刑、而臣愧惻爲明之、猶願陛下作戒於將來也、事枉冤延羣臣杜口、竟無一人爲陛下言者、臣誠愧耻、忘其疎賤、冀陛下萬一感悟、甘就鼎鑊、無恨、解縉奏善長冤狀辭亦剴切、都勻安撫司散毛散狗長官司蠻民作亂、涼國公藍

玉遣鳳翔侯張龍等率兵討平之。○詔禮部製公侯伯屯戍百戶印。

先是上以公侯伯於國大有勳勞人賜卒百十有二人爲從者曰奴軍至是以公侯年老賜其還鄉設百戶一人統率其軍以護衛之給屯戍之印俾其自耕食

召涼國公藍玉還京尋詔還鄉

賜鈔三千五百錠黃金三百兩白金二千兩文綺三十疋綾十疋仍命工部具舟送之

冬十月降詔刊行韻會

時洪武正韻頒行已久，上以其字義音切未能

盡當，命翰院重加刪正。

命劉基孫劉薦襲封誠意伯，復以基次子仲璟為閣

門使。

初基爵止其身不世襲，既而基積忤胡惟庸，為所害。基子璉為江西叅政，又為惟庸黨沈立木所脅，發憤成疾卒于官。及惟庸敗，朝廷憫之，命璉子薦襲封，贈祿二百六十石，共食祿五百石，賜鐵券。子孫世襲。

時并令儒臣修孟子節文。

先是，上覽孟子至草芥寇讐之說，大不然，謂非

臣子所宜言，議欲去其配享，詔有諫者以不敬論

且命金吾射之，刑部尚書錢宰抗疏入諫，輿觀自

隨，袒胸受箭，曰：臣得為孟軻死，死有餘榮。上見

其誠懇，命太醫院療其箭瘡，而孟子配享得不廢。

至是乃命修孟子節文，凡以不尊君為主，如諫不聽則易

位反君為輕之類，皆刪去。

錢宰被徵修纂尚書，會選孟子節文，偶微吟曰：四

鼓鼙，起着衣，午門朝見尚嫌遲，何時得遂田園

樂睡到人間飯熟時。上廉知之明日文華宴畢，面諭諸儒曰：昨日好詩，然曷嘗嫌汝何不用憂字，宰驚悚謝罪，未幾皆遣還。

十一月以重慶府永州縣知縣王佐為翰林院侍讀。○置景東蒙化二衛。○十二月福建布政司進南唐書金史，蘇轍古史。○擢夷陵州學正張智為禮部試左侍郎，鞏昌教授李本立為翰林院編修。○西番諸夷遣使表貢方物。○諭刑部令死罪輸粟北邊以自贖。○相人袁珙入燕。

珙，鄞縣人，字廷玉，少游海上，遇異人授相術，論人吉凶輒驗。燕王聞其名，密召至北平，一見伏地叩頭，仰對曰：殿下龍質鳳姿，天高地厚，大明麗中，神略內蘊，真太平天子。燕王問度在幾何時，對曰：年踰四十，紫髯過臍，當是時撥亂反正，萬邦一統，王喜，留府中久之，已而乞歸，靖難後召珙為太常寺丞，子忠徹序班，忠徹能傳父術，宣德朝常侍上言：天顏慘肅，恐宗人有急變，謀上者未七日樂安反，書至，官尚寶少卿致仕。

昭代芳摹卷之九

昭代芳墓卷之十

武原臣徐昌治述

太祖高皇帝

辛未洪武二十四年

二月擢河間府景州學正胡委安試國子祭酒○三月
 戊子朔日有食之○策試會試舉人三十一人於
 奉天殿擢許觀為第一○封皇子榑為慶王在慶陽
後徙常
 川松為韓王在開模為潘王在潞桎為唐王在陽
 諭皇太子諸王

上諭皇太子諸王曰、人君之有天下者、當法天之德、終始不倦、則庶事日修、若怠惰侈肆、則政衰教弛、虧損天德、而欲長保天位者、未之有也、昔元世祖東征西討、混一華夷、是能勤於政事、至順帝偷惰荒淫、天厭人離、遂至喪滅、殷鑒不遠、爾等當克謹克慎、庶永保基業、

更定六科官制、○命禮部頒書籍於北方學校、

秋八月乙丑、命皇太子巡撫陝西、

上諭皇太子曰、天下山川惟秦中號爲險固、向命

鍾澤天儀

汝弟分封其地、已數十年、汝可一遊、以省觀風俗、慰勞秦民、○遣使勅諭皇太子曰、爾自幼至長、未嘗遠出、今命爾巡行陝西方渡江之際、雷起東南、爾征西北、爾前行、雷從後、威震之兆也、然一旬之間、久陰不雨、占法主陰謀事、爾宜慎舉動、節飲食、嚴宿衛、親君子、遠小人、務在存仁養性、施恩布惠、以回天意、

藍玉征虜、歸至北平、以名馬獻、文皇不受、玉慙謝、歸、見太子、太子妃、開平王女也、因說太子曰、殿下

試觀 皇上於諸子中最愛者爲誰、太子曰、鴟鳩之愛焉、有軒輊、玉頓首曰、臣觀燕王、英武得人心、威名日盛、皇上所最愛、又聞術者言、燕地有天子氣、臣幸托肺腑、願殿下自愛、

擢江西建昌府南豐縣典史馮堅爲都察院左僉都御史、

堅言九事、一曰、願養聖躬、二曰、慎擇老成之臣、三曰、攘夷狄、四曰、精選有司、五曰、褒封祀典、六曰、減省宦官、七曰、調易邊將、八曰、採訪廉能、九曰、增置

關防、書奏、上曰、所言知時務、達事變、但調易邊將一說、未然、若邊將數易、則兵之材力、勇怯、虜之出沒情狀、山川形勢、險阻不能熟知、何以制敵、使其如趙充國、班超輩、惟恐任之不久、何以數易哉、然堅之言、關於政體者多、是可嘉也、復以吏部考功主事周丹爲新化縣丞、

丹溫之永嘉人、性明敏、有治才、初由進士授新化丞、在官以廉勤稱、驗民貧富、及丁稅多寡、第爲土中下籍記之、遇有賦役、隨輕重使之、民晏然安業、

由是流民之歸者益衆滿考課最陞考功主事既而縣民蕭俊等詣闕言自本官去職縣政復擾民不安業乞令再任上命吏部俾復爲縣丞仍令禮部宴賞而遣之

皇太子還自陝西○十二月命景川侯曹震往四川治道路

震至瀘州按視有支河通永寧界乃鑿石削崖直接其地以通漕運復闢陸路作驛舍郵亭駕橋立棧自茂州一道至松礮一道至貴州以達保寧通

陝西由是往來便之

命湖廣寶慶舍人倪基叅贊清平衛事以上言四事而嘉之也

壬申二十五年春正月穎國公傅友德請懷遠等縣官地爲田圃不許○河決武陽

三月命宋國公馮勝穎國公傅友德等往陝西山西河南簡閱士馬○夏四月命涼國公藍玉率蘭州諸衛將士征西番罕東之地○丙子皇太子薨太孫純孝絕粒五日

上御東角門召廷臣諭之曰朕老矣太子不幸遂至於此命也祔葬孝陵東冊曰名以彰德諡以表

行古今通議爾皇太子標居儲位二十五年分理庶政裨贊弘多特遵古典從公議賜謚曰懿文

詔都督聶緯總兵討建昌叛酋月魯帖木兒

涼國公藍玉師至建昌

初以聶緯為總兵命侯玉至緯為之副

六月西平侯沐英卒上哭之慟輒視朝親製文遣

祭封黔寧王謚紹靖命其子春襲封侯往鎮雲南

時英守雲南聞皇太子薨號泣不輟遂致失聲飲食為少是月丁卯卒年四十八塑像功臣廟仍配享太廟贈三代皆王爵英為人寬洪沈毅識明而見高謀深而慮遠臨事果斷賞罰明信用兵如

神有功不伐居貴不驕凡得上賜悉以給將士故能得其死力其鎮雲南也簡官僚條惠政剔奸蠹恩威並施教化大行雲南遂為樂土

選秀才張宗濬等俾隨詹事府左右春坊分班直入

華蓋殿

侍講畢近前說民間利害田里稼穡間陳古今孝

弟忠信文學材藝日以為常

秋七月四川都指揮使瞿能率兵討月魯帖木兒大

破之

瞿能率各衛兵至雙狼寨攻破之進至打冲河三

里所與月魯帖木兒遇大戰，又敗之。進至水西，其截路寨上酋長沙納的等皆中矢死，能還攻天星。臥漂諸寨皆克之。先後俘殺千八百餘人。月魯帖木兒復遁入栢興州。

命普定侯陳桓往陝西修連雲棧，以入四川。都督王成往貴州平險阻，治溝澗，架橋梁，以通道路。

靖寧侯葉昇坐交通胡惟庸事覺，伏誅。○頒醒貪簡要錄于內外諸司。

九月高麗李成桂幽其主瑤而自立。

庚寅立皇孫允炆爲皇太孫。

詔曰：曩者列聖相繼，馭宇者首建儲君。朕甲辰卽王位，戊申卽帝位，於今二十五年。前者選將練兵，奠生民於田野，統一以來，除奸貪，去豪強，用心多矣。邇來蒼顏皓首，儲嗣爲重。九月十三日，冊嫡孫允炆爲皇太孫，奉上下神祇，以安黎庶。

以方孝孺爲漢中教授，詔許水陸給舟車赴任。至官日，與諸生講習聖學。蜀獻王聞其賢，命世子受學，名其讀書之廬曰正學。

孝孺字希古聰穎絕倫雙眸炯炯一目十行俱下
積寸為文雄邁醇深鄉人呼為小韓子見典冊所
載聖賢遺跡欣然有願慕之志
從宋濂遊同門名士盡出其下

涼國公藍玉遣送建昌叛酋月魯帖木兒至京伏誅
藍玉兵次栢興州遣百戶毛海以計誘致月魯帖
木兒并其子胖伯遂降其眾班師而都指揮瞿能
同知徐凱亦還成都

閏十二月更高麗為朝鮮國
免翰林院學士劉三吾官

癸酉二十六年春正月起致仕兵部尚書唐鐸以刑

部尚書楊靖皆兼太子賓客

上嘗曰都御史詹徽刑部掌部事唐鐸二人性行
不同下人事之亦異徽剛斷嫉惡不容奸偽役吏
髮蓬面垢容愁肌瘦不異羈囚以不得肆其貪故
若是不鐸始友及臣至今三十四載交不知變色口
不出惡聲德有餘而才稍不足屢被小人誣誤極
刑者數矣朕深知其德曲宥弗罪奸人忌徽剛則
謗訕滿朝鐸厚重無疵又謂懦而無為一切文移
計稟皆舞文弄法愚鐸賄賂公行鐸無可奈何嗚
呼聰明決斷者以為非淵德海涵者以為愚人
心不古若此邪徽從子希原為中書舍人善大書
兼歐虞韓柳凡宮殿
城門坊扁皆希原書

乙酉殺涼國公藍玉吏部尚書詹徽

玉為錦衣衛指揮蔣瓛告謀反命羣臣訊狀伏誅

徽以文行歷官監察都御史陞左都御史上謂
徽奉職公勤復其家擢為吏部尚書兼左都御史
有龍江衛吏以過罰書寫值母喪乞守制徽不聽
吏擊登聞鼓上切責吏得終喪至是坐藍黨死
詹徽素刻薄嘗陷李善長又惡解縉欲中縉危法
懿文太子亦恨徽徽與太子錄囚太子欲開釋微
輒文附重法太子為白上先入徽言謂太子曰
徽執者法也太子因言立國以仁厚為本上笑
曰汝欲遂自為皇帝耶太子懼因感疾卒謂建文
君曰詹徽殺我建文君為太孫錄藍獄命先斷徽
手足戮於市

二月命宋國公馮勝穎國公傅友德往北平等處備

邊聽燕王節制

遣禮部員外潘善應往祭廬山為周顛仙立碑○九
月復以劉三吾為翰林學士○遣使齎勅勞河南按

論有司凡
遇歲飢先
發倉廩貸
民然後奏
聞著為令

察司僉事王平

平巡按至孟津有司歛眾財以賂平平械其人并
所賂來奏上嘉平得憲臣體命賜平文綺襲衣
及鈔百錠書吏衣鈔減平之半仍以勅書勞勉之
以鄭濟為左春坊左庶子王懃為右春坊右庶子
上以東宮官屬久闕命廷臣舉孝弟節行之士廷

臣以浦江鄭氏對。上曰：鄭氏，朕素知，聞其里人

王氏亦倣鄭氏家法，皆可選用，以風勵天下。乃徵

兩家子弟，年三十以上者，詣闕。既至，令自推舉。鄭

氏舉濟，王氏舉懃，餘皆給道里費遣還。

封皇子榘為岷王。

在岷州，後徙武岡。

榘為谷王。

在上谷。

○永鑑

錄成，頒賜諸王。

其書輯歷代宗室諸王為惡悖逆者，以類為編，直

敘其事，頒賜諸王。又輯歷代為臣善惡可勸懲者，

別為書，名曰世臣總錄，以頒示中外羣臣。

詔有司賑貸貧民

信郡中

初架石

梁有謠

曰人從

橋上行

狀元此

時生其

父首從

橋行速

還家有

生兒之

喜後果

如其言

甲戌二十七年春正月，建漢壽亭侯關羽廟于鷄鳴

山之陽，與歷代帝王及功臣城隍廟並列，通稱十廟。

○三月，策試會試中式舉人于奉天殿，擢張信為第

一。○命韓王潘王分道省視，秦晉燕周齊王

上以韓王松濬王模年幼，欲其遊觀諸王國都，以

敦友悌之情。

九月，命禮部定議旌表孝行事例。

青州府日照縣民江伯兒，以母病，割脇肉食之，不

愈，乃禱于岱嶽，誓云：母病愈，則殺子以祀。既而母

倭寇浙
東都督
劉德楊
文等巡
視兩浙
防倭

病愈竟殺其三歲子祭之。有司以聞，一上怒曰：父
子天倫至重，禮父為長子三年服。今百姓無故賊
殺其子，絕滅倫理，宜亟捕治之。勿使傷壞風化。遂
逮伯兒杖一百，謫戍海南。因命禮部定議旌表孝
行事例行於天下。

定正蔡氏書傳成。

蔡沉著日月五星運行與
朱子詩傳不同故正之

撒馬兒附馬帖木兒遣酋長迭力必失等奉表來朝，
貢馬二百匹。○寰宇通志書成。○穎國公傅友德卒。
乙亥二十八年春正月，遣使勅周王橚發河南屬衛

馬步軍晉王橐發山西屬衛馬步軍往塞北築城屯
田。

命都指揮使周興等往三萬等處勦捕野人，
信國公湯和卒。

先是和既歸鳳陽暮年多疾，上眷念之，每歲必
一召入覲，賜以安車入殿庭，宴賚備至，相對語舊
勞，撫摩感泣，賜緡鈔預為塋墓之資。至是卒。上
嗟悼，輟視朝，親為文授使者以祭，封東甌王，謚襄
武，塑像功臣廟，復配享太廟。上之初起兵也，和

為滁陽王部曲，率先推戴，聽命惟謹。顧上嘉焉，恩禮之隆，時莫與比。

九月，燕王進呈永清左衛龍門東嘉禾。一莖三穗者二本，二穗者

六本，上親製嘉禾詩賜之。○宋國公馮勝卒。

詔岷王梗之國。

初，岷王定都岷州，上以雲南土曠，人悍，必親王

往鎮之，故命岷王改都焉。

詔免山東及應天等五府稅糧。○始令法司擬罪，引

大誥減等。○頒祖訓條章於內外文武諸司。

禁黥官刑 則之刑

勅曰：自古國家建立，法制皆在始受命之君，以後子孫不過遵守成法，以安天下。蓋創業之君備歷世故艱難，周知人情善惡，後世守成之君生長深宮，未諳世故。山林初出之士，自矜已長，至有奸賊之臣，徇權利作聰明，變更祖法，以敗亂國家，貽害天下。故日夜精思立法垂後。

閏九月，詔更定親王歲支祿米。

親王歲給祿米萬石，郡王二千石，鎮國將軍一千石，輔國將軍八百石，奉國將軍六百石，鎮國中尉四百石，輔國中尉三百石，奉國中尉二百石，公主及駙馬二千石，郡主及儀賓八百石，縣主及儀賓

六百石郡王及儀賓四百石縣君及○秦愍王卒
儀賓三百石鄉君及儀賓二百石世子尚炳嗣
冬十月冊馬氏為皇太孫妃光祿寺卿馬泉女也

征南將軍楊文等平奉議州蠻寇

楊文等師至奉議州分兵勦向武都康龍英等州
斬叛酋黃世鉄黃嗣徽等又征南丹州斬其酋莫
金分兵勦六藤峽江南巖蓮花寨等處擒戮其叛
酋陸光公等餘悉撫定之開設奉議南丹潯州慶
遠四衛向武池河懷集賀縣四守禦千戶所鎮守
其地遂班師

上以子孫蕃衆命名慮有重復乃于東宮諸王世系
各擬二十字

以某字為命名之首其下一字則臨時定議以為
二名編入玉牒至二十世後復擬續增如燕王位
下二十字則曰高瞻祈見祐厚載翊
常由慈和怡伯仲簡靜迪先猷是也

十一月令儒臣書尚書無逸篇於殿壁
禮制集要成頒布中外

上謂翰林學士劉三吾等曰朕自即位以來累命
儒臣歷考舊章自朝廷下至臣庶冠婚喪祭之儀
服舍器用之制各有等差著為條格俾知上下之

分而奸臣胡惟庸等擅作威福謀為不軌僭用黃羅帳幙飾以金龍鳳紋邇者逆賊藍玉越禮犯分牀帳護膝皆飾金龍又鑄金爵以為飲器家奴至於數百馬坊廊房悉用九五間數而蘇州府民顧常亦用金造酒器飾以珠玉寶石僭亂如此殺身亡家爾等宜重加考定以官民服舍器用等編類成書申明禁制使各遵守至是書成

其目十有三曰冠服房屋器皿傘蓋床帳弓矢鞍轡儀從奴婢俸祿奏啓本式署押體式服制

十二月諭戶部自二十六年以後栽種桑棗果樹與

詔後嗣君
不許立丞
相

二十七年以後新墾田地俱不起科○朝鮮國王李旦遣使奉表貢方物○洪武志書成詔頒行之

丙子二十九年春正月以詹事府丞杜澤為吏部尚書左春坊左贊善門克新為禮部尚書

安南國以其前王陳叔明之卒來告哀○征虜前將軍胡冕討湖廣郴桂廣東潭源廣西平川諸蠻平之○三月甲子燕王抵大寧擒胡將索林帖木兒等於徹徹兒山

文皇親率諸軍北至徹徹兒山遇胡兵與戰擒其

首將索林帖木兒等數十人追至兀良哈秃城遇哈刺兀復與戰敗之遂班師

築防河

罷漢揚雄孔廟從祀進董仲舒

行人司副楊砥言孔子廟庭從祀諸賢皆有功世教若漢揚雄臣事賊莽忝列從祀以董仲舒之賢反不與焉事干名教甚為乖錯上納其言

八月免太平等五府田租○改六部諸屬為清吏司

○頒表箋文式於天下

先是天下諸司所進表箋多務奇巧詞體駢儷

詔魏國公徐輝祖同國子監官考試監生

上甚厭之乃命撰慶賀謝恩表箋成式頒于天下九月大賚致仕武臣

論之曰元末兵爭中原鼎沸爾諸將臣從朕共平禍亂勤勞備至天下既定論功行賞使爾等居官任事子孫世襲永享富貴朕思起兵時與爾等皆少壯今皆老矣久不相見心恒思之故召爾等來所賜薄物以資養老爾等還家撫教子孫以終天年諸臣皆感激叩首謝有墜淚者

十月詔定各司奏事次第

上與侍臣論唐不當以宦者掌兵

甲寅晦皇曾孫文燧生

太孫允炆長子也 上以十月數終又生于晦日

命內庭勿賀

十二月復永州知府余彥誠等十人官

初彥誠與齊東知縣鄭敏定遠知縣高斗南儀真

知縣康彥民岳池知縣王佐安肅知縣范志遠當

塗知縣孟廉縣丞趙森懷寧縣丞蘇益等先後坐

事逮獄至是其民具列各官善政詣闕以請 上

嘉之賜彥誠等襲衣靴鈔遣還仍給耆民道里費

丁丑三十年春正月命長興侯耿炳文武定侯郭英

巡西北邊以備胡寇○漢沔盜高福興等為亂詔耿

炳文郭英討平之○初置雲南提刑按察司

二月會試天下貢士翰林院學士劉三吾安府紀善

白信蹈為考試官取泰和宋琛等五十二人中原西

北士子無預者三月殿試賜進士以閩縣陳郊為第

一、

被黜落者咸以為言 上怒命儒臣再考下第卷

中擇文理優長者復其科第于是侍讀張信侍講

陳郊閩人精數學就試之日謂所親白今歲狀頭當刑奈何已而身罹之

戴彝贊善王俊華司憲等受命閱卷或傳三吾與信蹈至其所囑以卷之最陋者進呈上閱卷驗之益怒謂其胡藍餘黨命刑部拷訊惟三吾信蹈及司憲爲藍黨餘皆胡黨戴彝不與焉詔宥三吾謫戍邊餘皆凌遲於市於是覆閱取六十一人皆北人也

古州上婆洞蠻林寬作亂龍里千戶吳得鎮撫井孚戰死

吳得井孚議城守之計令人馳報貴州都指揮使司堅守以待援至賊縱火燒四門攻城益急得曰我等爲國守邊又有父母在城今賊勢如此若城不能守父母不能救是不忠於君不孝於親吾何用生爲卽率麾下馳入賊陣中殺數十人搏戰不已遂中毒弩死孚繼戰亦死於陣城遂陷事聞上曰忠孝立身之大節能克全者古人所難今吳得井孚臨難捐身因忠顯孝非烈丈夫不能命追贈得爲指揮僉事孚爲正千戶各令其子襲職仍以鈔帛恤其家

夏四月諭燕王備邊兼築大同城

陞刑科給事中張思恭為刑部右侍郎

人有暮夜以金遺思恭者却而不受其人委金而去詰旦思恭言于朝上善思恭有守遂陞其官

勅晉燕代遼寧谷六王勒兵備虜

陞翰林修撰張信為侍讀編修戴燾為侍講

六月策試下第舉人于奉天殿擢韓克忠為第一

翰林院學士劉三吾暴卒

太祖嘗欲易太子學士劉三吾痛哭曰太子天下本若欲易之置秦晉二王于何地忤旨降為博

世稱春榜夏榜

又謂南北榜自

陳郊伏法割籍

故今但有韓克

忠榜而

郊榜無

可考矣

士尋復學士易儲事竟寢洪武末二王相繼薨而聖祖隨亦宴駕使更得一二年在位其立文皇無疑而天下免數年戰爭之苦

駙馬都尉歐陽倫有罪賜死

先是立茶馬司于陝西四川等處令西番納馬易

茶以私茶出境者斬關隘不覺察者處極刑時駙

馬倫奉命西使以巴茶私出境貿易令陝西布政

使司移文所屬起車載茶渡河倫家人有周保者

索車至五十輛蘭縣河橋巡檢司史某被捶不堪

以其事聞上怒以布政司官不言并倫賜死保

等皆伏誅

置政平訟理、二藩論罪囚、

上諭刑部官曰、爾等每論囚、引至朕前、雖詳其致罪之由、然一時裁決、恐未得其情、自今以所犯來奏、然後引至承天門外、命行人持訟理幡、傳旨諭之、其無罪應釋者、持政平藩、宣德意遣之、

八月、以義門鄭沂爲禮部尚書、○冬十月、停遼東海運、○十一月、平緬蠻、刁幹孟叛、逐宣慰使思倫發、命西平侯沐春爲征虜前將軍、都督何福爲左將軍、徐

凱爲右將軍討之、

十二月、癸未、上不豫、

廷臣數問安、勅之曰、昔有元治世、民庶乂安、何期至正之君、失於勤民、慢於事神、由是倡亂稱尊者、恣爲吞併、自相磨滅、如此者、十有七年、朕西定荆楚、東平吳越、北撫華夏、爲衆所推戴、定鼎金陵、國號大明、改元洪武、三十年于茲、朕壽六十九矣、靜而思之、非皇天眷命、安得居天位、若是久哉、古語云、天不與首亂、豈非朕無心于天下、以救民爲

心故天特命之乎。近者失調受疾，卿等頻來問安，朕以此示卿等，宜竭忠修職，副朕至懷。

戊寅三十一年春二月，平緬蠻刁幹孟請入貢，都督僉事徐凱執卜木瓦寨叛酋賈哈刺送京師，伏誅。○三月，琉球國中山王察度遣使貢馬及琉璜胡椒等物，遣子弟學于國子監。

勅燕王與代遼寧谷王禦虜。○進齊恭兵部尚書陞刑部侍郎暴昭為左都御史，天策衛經歷周璿為左僉都御史，龍江衛經歷黃福為工部左侍郎，羽林

衛經歷邊昇為工部右侍郎。

皆以言事稱旨也

五月都督何福擒叛蠻刁幹孟思倫發復還平緬。

甲寅上不豫。○乙亥勅燕王統鄖制總率諸王備虜

勅燕王曰：朕觀成周之時，天下治矣。周公猶告成王曰：詰爾戎兵，安不忘危之道也。今雖海內無事，然天象示戒，夷狄之患豈可不防？朕之諸子，汝獨才智克堪其任。秦晉已薨，汝實為長。攘外安內，非汝而誰？已命楊文總北平都司行都司等軍，郭英總遼東都司，并遼府護衛，悉聽爾節制，爾其總

率諸王相機度勢用防邊患又安黎庶以答上天之心以副吾托付之意

閏五月乙酉上崩于西宮

遺詔曰朕受皇天之命三十有一年憂危積心日勤不怠專志有益於民今年七十有一筋力衰微得萬物自然之理其奚哀念之有皇太孫允炆仁明孝友天下歸心宜登大位以勤民政中外文武臣僚同心輔佐以福吾民葬祭之儀一如漢文帝勿異布告天下使知朕意孝陵山川因其故無

改諸王臨國中無得至京王國所在文武吏士聽朝廷節制惟護衛官軍聽王諸不在令中者推此令從事

皇太孫治喪禮

披髮哭踊哀動左右勅有司喪儀悉遵周禮於是倣金縢遺制前朝後殿左右角門及西宮內寢各設座如生存凡十一所有久不御者卽以香湯埽之陳祖訓於東直殿設重器於西直殿京官四品以上朝服執鉞立于諸陛之上自初十以至十

六日哭臨如禮，晝不飲，勺水夜不就枕，簞先是太祖不豫，多暴怒，遭譴戮者甚衆。太孫入侍，事必躬承，服藥則親嘗，以進去後，則親杖以起，唾壺溺器之屬，靡不手提以獻，而愉色婉容，藹然可掬。太祖氣亦漸平，多所全宥，當深更夜分，侍衛酣寢，際呼無不應，應無不起，蓋終夕未嘗交睫也。太孫素豐腴，至是哀毀骨立矣。是日率諸大臣迎之于大明門外，羣臣百姓望見其毀瘠之容，深墨之色，與哭泣之哀，莫不舉手加額曰：天子純孝，舉

喁喁然，有至德之思焉。

是月辛卯，皇太孫卽皇帝位。

洪武三十一年閏五月十六日，卽皇帝位，以明年爲建文元年，大赦天下。是日，塋孝陵。

援遺詔，止諸王會塋，詔下，諸王皆怒。燕王入臨，將至淮安，齊泰言于帝，令人齋勑，勒使還國，詔行三年喪禮。

有司執例以請，上出諭曰：三年之喪，自天子達

于庶人先太子殂，向欲終之，而不可得。茲當大故，敢不如禮。有司奏遺詔在，復傳論曰：魏文帝，胡人也，猶能守禮。況朕讀書知禮義，不能遵古先王之定制。有司復奏曰：漢文詔以日易月，而歷代因之。遺詔諄諄，欲一如漢文行事，其慮甚遠。願陛下少抑至情，俯循衆請。復論曰：朕非敢效古人亮闇，不言也。郊社宗廟，朕將執紼而行事，朝貢訟獄，罔敢不親。但朝則麻冕，麻裳退則齊衰杖經，食則膾粥，有何不可。不然，食稻衣錦，爾輩真以爲安乎。羣

臣奏曰：陛下旣不廢政事，而自致哀情，敢不惟命，遂定儀注以進。

六月甲辰上，皇祖考大行皇帝，謚曰欽明啓運峻德成功統天大孝高皇帝，廟號太祖。皇祖妣孝慈昭憲至仁文德承天順聖高皇后，尊母呂氏爲皇太后。

立孝陵衛。○革冗員。○初省州縣。

帝本志切養民，而所爲多戾。四年之間，今日省州，明日省縣，今日并衛，明日并所。今日更官制，明日更勳階，宮門殿門名題日新，雖以干戈倥偬，日不暇給，而曾不少休。

以中書舍人蹇義爲吏部右侍郎、戶部主事夏原吉爲本部右侍郎。○命兵部尚書齊泰、太常寺卿黃子澄預參國事。○以平江知縣陳彥回爲徽州知府。以方孝孺爲翰林侍講學士。

孝孺、台州寧海人，幼精敏絕倫，爲文雄邁醇深，恒以明王道、闢異端爲己任。世謂程朱復出。洪武十五年，以薦召見。太祖喜其舉動端整，謂皇孫曰：「此莊士當老，其才輔汝，遣還鄉。」二十五年，又以薦召至。太祖曰：「今非用孝孺時，稍擢漢中府學教

授。建文卽位，廷臣交薦，召爲翰林博士，尋陞侍講學士。

秋七月，廢周定王爲庶人。

人告王反，上命曹國公李景隆卽訊之。景隆大索金寶，王不能應，坐王反，逮至京，竄雲南。諸子並列流放，已而召還南京。

八月，加魏國公徐輝祖太子太傅。

時燕藩選兵將練士馬，以勾逃軍爲名，招致異人術士，至者多以天命有歸爲言，由是靖難之志決。

矣時僧道衍號知兵且知天文謂圖大事必成燕王問人心所向對曰天之所造何論人心自是燕王遂以道衍爲軍師燕王妃輝祖之妹也輝祖雖與燕王至親而心在帝室嘗召對密言燕情帝信任之加太子太傅與李景隆同掌六軍協謀圖燕吏部尚書茹常免以雲南左布政使張統爲吏部尚書○徵江西處士楊士奇授齊府審理副留翰林纂官○禮部尚書鄭沂免以雲南右布政使陳迪爲禮部尚書

九月長星西隕有聲如雷○冬十月熒惑守心十一月監察御史解縉謫河州衛吏

縉時時直言太祖慰諭賜緡曰汝歸且讀書著述縉歸家八年太祖崩縉來奔喪有司劾縉母喪未葬父年九十違詔奔喪謫河州衛吏以刑部侍郎張昺掌北平布政司事謝貴張信爲北平都指揮使

建文初諸大臣言藩王相繼變告藩國所在宜簡精強謀略有威望者爲守臣彈壓於是昺出掌北

平布政司事與謝貴並受密命以往

十二月召漢陽知縣王叔英爲翰林修撰

方孝孺欲復井田叔英貽書力阻之上資治八策
曰務問學曰謹好惡曰辨邪正曰納諫諍曰審才
否曰慎刑賞曰明利害曰定法制皆援證今古可
見行事又曰太祖除奸剔穢抑強鋤梗如醫去
病如農去草去病急或傷體膚去草嚴或傷禾稼
是故體膚病去則宜調燮其血氣禾稼草去則宜
培養其根苗深有補於時云

以董倫爲禮部右侍郎兼翰林院學士

倫事懿文太子陳說忠厚太祖聞而善之擢左

春坊大學士太子薨出爲河東叅議帝卽位眷

念舊臣召至京師遂有是擢賜書願老堂三字及

髹几玉鳩各一倫上表稱謝略云桓榮設几杖於

太常而不聞有宸翰之賜晏殊題舊學於神道而

不見有几杖之頒自今將杖以戒噎則當思四海

或有饑餒之民憑几以安身則當念一物或有失

所之歎上甚嘉之

有祭酒劉崧者博學有志行家素貧及貴未嘗增產業居官十歲不以妻子相隨清苦如布衣時其為北平按察副使携一童往至則遣還每夜孤燈一榻讀書不輟五更衣冠起坐待旦招徠進退慰安反側惟務寬厚存大體尤慎威刑小人險狡輒先事防制溫顏異詞而見者凜然致仕歸益謙下問學之功老而彌篤與人言未嘗及官政文雅粹詩有唐人風韻

以王紳為國子監博士

紳先翰林侍制禕之子也禕使雲南為元孽梁王所殺紳甫十三與兄綬事母盡孝母卒哀毀踰禮未幾綬亦歿紳笑笑憂患中綜理生業而傑然負奇志暇日益取經史百氏窮其指歸宋濂一見器

之曰子充有後矣至是給事中徐誠等薦之

詔以監察御史尹昌隆奏疏頒示天下

時帝視朝稍晏昌隆諫未明求衣日盱求食常如不及斯為庶幾今乃日晏臨朝羣臣宿衛疲於伺候曠職廢業上下懈弛臣恐播之天下傳之四夷非社稷之福也

故前軍都督府斷事高綱上書論時政

魏事母至孝母老疾綱奉湯藥不懈母亡廬墓三年洪武壬戌貢入太學上書論時政其略曰今欲

弱侯王定經制，俾萬世無疑。臣請借漢爲喻，漢高起布衣，推秦滅項，以定禍亂，遂大封同姓，分王天下之半，蓋欲藩四夷而禦中國也。豈其遺文帝不治之痼疾哉？故賈誼脛腰指股之喻，痛哭流涕之歎，無非欲削六國之意也。賴文帝寬厚含容，而吳王几杖之賜，折其强悍，不臣之心，迫厲王謀反，僅廢處蜀郡，已不免有尺布斗粟之謠。景帝寬厚，不如文孝，又晁錯輔以刻深徑削諸侯，遂挑六國之禍，非文帝付託得人民心，輔漢幾危社稷，是晁錯

不能辭其責矣。我

太祖高皇帝起類漢高，大行

皇后，有后妃不妬之行，則百斯男，無不穆穆皇皇。宜君宜王者矣。故本宗百世爲天子，支庶百世爲諸侯，體三代之封建，分茅胙土，陝西百二山河，其人勇悍，西隣土蕃，以秦府王之。山西表裏山河，其人剛壯，北近胡虜，以晉府王之。北平雖無名山大川之限，而桑土沃饒，廣畜羊馬，其人衣皮食肉，弓馬是務，遼金元藉之，各興一代之業。故以燕府王之。四川雖曰西南一隅，山河阻深，劉備諸葛亮據

之。而虎視吳魏者也。故以蜀府王之。其餘楚湘齊
 充寧遼谷代慶肅星羅棋布。莫非欲護中國而屏
 四夷也。今各處親王固多驕逸。以臣愚見。不當聽
 晁錯削奪之策。當行主父偃推恩之令。其賢如漢
 之河間獻王。與東平王蒼者。下詔褒賞之。其驕逸
 不法。如漢之淮南濟北者。初犯則容之。再犯則赦
 之。三犯而不改者。當合親王告太廟。削其地。而廢
 處之。豈有不順服哉。未逾年。北平兵起。
 召故翰林學士宋濂孫懌。為翰林侍書。○茹常仍以

尚書掌河南布政司事。○以王鈍為戶部尚書。鄭賜
 為工部尚書。

尚書開濟敏慧有才辯。凡國家經制。田賦獄訟工
 役河渠事。眾莫能裁。定得公一算畫。即有條理。品
 式可為
 世守。

朝鮮國王李旦請老。以子芳遠嗣王。

附勳臣傳

中山徐武寧王。名達。鳳陽人。幼儻沉雄。有智略。
 年二十二。從上起兵。上即皇帝位。加中書右丞
 相。三年。大封功臣。進魏國公。右丞相。參軍國事。與
 世券。四年。賜王及常李鄧馮四公。佃墳儀仗。戶表
 王里曰大功。明年二月。卒。謚武寧。上為神道碑
 文。王言簡慮精。當提兵時。令出不二。諸將若神明

受命而出，功成而旋，不自矜伐，至於封姑蘇府庫，置胡宮美人，財寶無所取，婦女無所愛，可謂忠志無疵。昭光天日者，侑享太廟，肖像功臣，廟位皆第一。子四：輝、祖、添、福，增壽膺緒長女，仁孝皇后。次代王妃，次安王妃。洪武二十一年，輝祖嗣建文君即位，特見信任，靖難兵起，與齊黃盧振張昺葛誠督諸兵北進，屢有功，召還。文皇即位，勒罷尋幽繫，永樂三年，勅禮部歲五祀王著令五年輝祖卒，輝祖子釋迦保見上，賜名欽，乞守墓南京。上怒，謫居中都，弟承宗嗣。天順元年，守備南京，開平常忠武王名，遇春懷遠人，性剛直，膂力絕人，乙未來歸，從渡江，比抵采石，元兵陣磯上下，聯大舟，距三丈許，相顧莫敢先登。王後至，上麾之前，即捨舟，挺戈大呼，一躍而登，眾披靡，遂拔采石。歷著大功，至破開平元君北奔，俘宗王三人及平章鼎住等，全師還燕。次柳河川卒，謚忠武，喪至龍江，上為文往祭，侑享太廟。王謙慎不矜，有功無過，運籌決勝，不學而能，其從大將軍，謹聽約束，及乘

鉞專征，即能制節將士，所向克捷。時在上前，屢有直諫，其妻藍玉兄弟也。長子茂，洪武三年，以父功封鄭國公，與世券次，鼎次，森皆上所賜名。長女為皇太子妃，靖難兵至浦子口，昇及魏國公分道力戰，已而昇見文皇，得釋。昇子繼祖坐事，謫雲南臨安，弘治五年，詔錄太廟元祀功臣後，於是復及李鄧湯三家後，皆得為南京錦衣衛指揮使。嘉靖十年，進劉基侑享太廟，并議常李鄧湯四王後，十一年，詔誠意伯劉基裔孫世爵，又推念四臣之功，俾悉如基議，從事封常玄振懷遠侯李性臨淮侯鄧繼坤定遠侯湯紹宗靈壁侯各與世券。岐陽李武靖王名文忠，盱眙人，初名保，保父貞尚隴西長公主，以駙馬都尉封，思親侯，贈隴西王，謚恭獻。王生十二，喪母，甲午駙馬携至滁，見上。上見甥喜，且泣，賜姓名朱文忠，丁酉以舍人統兵，至餘杭，有功，即軍中，加浙江行中書省平章政事。復李姓，克上都，常將軍卒，詔王為大將，領其眾，歷著

大功破虜擒脫列伯授征虜左副將軍總兵北伐
 班師至龍江駕出勞江上王上平沙漠表是年大
 封功臣授曹國公同知軍國事與世券十四年召
 還叅贊軍國重事十六年兼領國子監事十七年
 卒贈岐陽謚武靖侑享太廟王器量沉閣人莫
 測其際臨陣路厲奮發遇大敵膽氣益壯好學飭
 行釋兵家居恂恂如儒士子三人皆上賜名長
 景隆次增枝次芳英洪武十九年景隆嗣靖難兵
 次江上景隆歸附得進太子太師尋修太祖實
 錄充總裁官永樂二年周王發其建文君時嘗至
 邸即訊受賂羣臣又劾景隆與弟增枝匿亡命
 革爵沒其家弘治中優給李性續封臨淮侯
 寧河鄧武順王名愈虹人狀貌魁梧有勇力智略
 過人父順與兄隆聚眾臨濠相繼卒眾推事王時
 年十六每戰必挺身破敵乙未率眾來歸充管軍
 總管以功進江西右丞加湖廣行省平章移鎮襄
 陽上無西顧之憂從大將軍平秦隴降河州朶
 甘烏斯藏封衛國公叅軍國事與世券九年土蕃

川藏遊掠烏斯藏使者改征西將軍進討十年督
 副將分兵三道併力覆巢穴窮追至崑崙山斬首
 功多召還至壽春卒謚武順侑享太廟樞至三
 山門上臨奠為視墓地歎曰愈事朕二十二年
 歷鎮八州有功無過命朱夢炎為文刻神道碑王
 器量宏偉沉毅簡重謙恭慎密孝友純備臨敵不
 懼有功不矜禮賢下士寬惠愛人長子鎮襲封國
 公次銘西安護衛指揮鏞旗手指揮使女妃秦王
 東甌湯襄武王名和鳳陽人倜儻饒智略壬辰率
 壯士從滁陽王時上在甥館王委心推翊為萬
 夫長攻滁授管軍總管上定建業王從徐將軍
 取鎮江陞統兵元帥同僉樞密院事十八年討平
 五開山獠還朝乞骸骨賜寶鈔造第鳳陽尋諭王
 曰日本小夷屢擾東海上卿雖老強為朕行視要
 地築城增戍固守備王行築海上城起登萊抵江
 浙凡五十九城二十年還京二十一年新第成率
 妻子辭去二十七年上思王特詔輿入觀明年
 卒謚襄武侑享太廟王沉毅質直勇而善斷不

妄發言入聞國論一語不泄行師受任奉詔即行
不少顧家臨敵果敢堅忍未嘗挫衄有語及兵書
者輒笑曰臨陣決機在智識敏達何泥古為家蓄
勝妾百餘暮年皆資遣歸賞賜多惠鄉隣父老及
孤寡無告者子五人鼎
隸觀熒醴女妃魯王
黔寧沐昭王名英定遠人八歲喪母無所歸上
憐之撫為子賜姓朱王天性忠孝厚重簡默齟齬
不喜狎戲年十八授帳前都尉以功轉廣武衛親
軍指揮使洪武元年從大將軍克延平擒陳友定
拔閩溪十八塞復沐姓十年充征西副將軍總京
畿兵伐蕃部川藏抵崑崙山封西平侯授券充征
南將軍副傅將軍討元孽梁王把匝刺瓦爾彌于
雲南每戰先登擣中堅諸將班師畱王鎮雲南定
貢賦均力役十七年平廣南蠻二十年詠浪穹鶴
慶劍川逋寇二十一年平緬衆初王畱鎮之明年
哭孝慈皇后再鎮之三年哭懿文太子極哀感
疾卒謚昭靖侑享太廟王寬弘沈毅謀慮深遠

臨事果斷凡得上賜悉給將士鎮雲南簡僚
剔姦蠹撫農興學墾田治水嚴城堡謹斥埃通鹽
井耒商旅軍食盈足恩威並施愛讀通鑑綱目大
學衍義不釋卷于四人春晟昂所駙馬都尉春
年十七從父征討有功授督府僉事二十五年奔
父喪還嗣侯鎮雲南畱意屯田水利平緬甸東川
叛夷復平越雋阿資刀千孟諸砦三十一一年卒建
文君憐春謚惠襄春無子是年九月弟晟以都督
嗣永樂六年晟平交趾功
封黔國公與世券留鎮
誠意伯劉文成公名基字伯溫青田人通春秋尤
精天文兵法隱居力學上手詔敘公勲伐召至京
稱公孔明之儔累欲封公謝辭三年封誠意伯八
年賜告歸又手書慰藉未幾卒公剛毅慷慨有大
節論天下安危義形於色與人交開心見誠至義
所不可無少假借所著文集五十卷行於世二子
長璉考功監丞試監察御史有文行次璟為谷府
左長史璉子薦二十四年嗣伯景泰三年命錄公

後天順二年勅祠公成化十八年勅取公像弘治十三年給事中吳士偉言公子孫宜世爵正德九年賜詔曰劉基學為帝師木稱王佐渡江策士無雙開國文臣第一受爵能讓懷辭金蹈海之風成功不居從辟毅封留之請特贈太師謚文成嘉靖十八年從刑部郎中李瑜請侑享太廟世其封爵九世孫指揮使

瑜嗣伯與世券越國胡武莊公名大海虹人長身鐵面智力過人甲午謁上為前鋒洪武元年築壇鷄籠山祭故功臣公位第一而祔以文臣沒王事者李夢庚王愷孫炎等二年立功臣廟於鷄籠山定祀二十一人命死者塑其像生者虛其位公嘗曰吾不知書吾行兵惟有三事不殺人、不虜人、婦女、不焚人廬舍、子德濟洪武三年從征莊浪失律宥復官後為都指揮使蔡國張忠毅公名德勝合肥人才略豪邁沉毅剛果集義眾結水塞自保乙未以舟師來歸上悅

曰方欲渡江乏舟楫而德勝至殆天意也友諒犯龍江呼諸軍力戰敗走友諒降其將張志雄等追友諒至采石戰歿謚忠毅侑享太廟子宣幼養子同嗣職宣長上命宣嗣同復姓名為汪興祖梁國趙武莊公名德勝鳳陽人狀貌魁梧膂力過人馬上運槊健捷如飛甲午聞母在滁陽軍中遂棄妻子來歸為帳前先鋒漢圍南昌公出戰射殺漢金指揮漢益兵晝夜急攻城且壞公先諸將死戰且戰且築城城壞復完巡城至東門敵發蹶張弩中腰箭深入六寸即拔出拊髀歎曰命也奈何大丈夫不能從主上掃清中原耳卒子獻領其眾公沉鷲簡靜剛明質直馭下嚴肅號令一行旗幟改色平生未嘗讀書隨機應變智略如神臨難不懼奮不顧身曾孫輔立功封武靖侯公進侑享太廟

謚武莊泗國耿武莊公名再成五河人癸巳來歸從征授百戶歷功泗滁和陽建康鎮江陞元帥先是士卒

徵私粟民間，號岩糧，民苦莫敢誰何。公盡罷之。壬寅，苗帥叛，公方與客飲，聞變，上馬收戰，卒不滿二十人，迎賊罵不絕口，死。子天壁，糾父部曲殺賊。北至王師，已誅賊，贈公高陽郡公。天壁嗣，守處州。洪武二年，進公侑享太廟。三年，加贈泗國公，謚武莊。太師丞相韓國李公，名善，長定遠人。上略滁陽，公謁道旁，留幕下，掌書記，謀議軍機，畫饋餉，甚見親信。論平吳功，封宣國公。十月，定官儀，尚左，改左相國，充總裁官，定律令，大封功臣，進封韓國公。券文比公蕭何。四年正月，致仕，賜臨濠地墳佃戶。董建臨濠宮殿，子祺尚皇長女臨安公主，為駙馬都尉。二十三年春，肅清逆黨，坐罪不問。會有星變，御史再劾公，遂暴卒。臨安公主卒于江浦，祺子二人，長芳，畱守中衛，指揮使，茂指揮。僉事，芳子五人，長恒，停襲。太子太師，穎國傅，公名友德，宿人。辛丑，率眾來歸，從征友諒，鄱陽湖被數創，戰益力。甲辰，從征武昌。

先登，面勝中矢，摧雄武衛指揮使，從取陝西。三年，克沔漢，是秋征甘肅，還封穎川侯。上為平蜀文旌公，平蜀之後，安輯撫禦。上將平雲南，命公巡川蜀，蠻地悉平。公因俗立法，定貢賦，興學校，掩戰，略廣屯田。南人，大悅。十七年，還京，論功，進封穎國公。與世券十九年，再征雲南。二十一年，復討曲靖。普安。二十三年，征沙漠，還駐開平。復征寧夏。二十四年，北征哈者，舍利王。二十五年，兼太子太師。二十七年，暴卒。子忠尚壽春公主。為駙馬都尉，謚金吾，所鎮撫。郭英，濠人，年十八，從上起義，兵稍帳中，戰蹟著前。上寧妃，英女弟也。遣餞之，第英素清儉，賜白金二十兩，親馬二十匹，移鎮北平，召進督府僉事。永樂元年，卒，贈管國公，謚武襄。子男十二人，鎮駙馬都尉，尚永壽公主女。二適郢二王妃，長孫女。仁宗貴妃，瑤，以貴妃兼放，得嗣侯。馮勝，初名國勝，又名榮，異後更名勝。兄國用，兄弟相與講讀，晝夜不分。獲智略，日克，同謁太祖。

於妙山功蹟著前會國用率子幼職掌親軍以平
 吳功陞右都督又西平土蕃封東國公賜世券勝
 為偏將時勇悍善戰及為大將軍稱廢紀律金
 山之役有大功上顧不悅幸之日贈恤不及
 藍玉定遠人長身顯面言動異常始以開平王妻
 弟從征惟鋒突圍累功至都督洪武十二年以征
 西番功封永昌侯與世券以北伐功進封涼國公
 玉功高驕橫上不喜會錦衣指揮蔣獻告玉謀
 反簿錄其家凡有片紙隻字者並逮獄獄
 上集羣臣廷議玉強辯轉展攀染不肯服
 汪廣洋高郵人寬和簡重通經能文善篆隸大書
 尤工詩歌少從余闕學遊太平上渡江召廣洋
 入見與語大悅留幕下為元帥府令史行樞密院
 掾史江南行者提控除照磨立執法議理司大書
 四字牌上以廣洋李勝端為執法官朝政有失
 執牌直諫又名為都諫官時楊憲為右丞惡廣洋
 軋已嗾御史劉炳劾廣洋不孝斥還鄉憲意未已
 又嗾炳劾謫海南李丞相奏憲誣大臣放肆為奸

上誅憲召廣洋還胡惟庸暴橫上怒廣洋朋黨
 又謫海南舟至太平上再遣勅責廣洋得書益
 慙大懼自縊死十三年惟庸

坐罪死遂詔天下罷中書省

桑敬父世傑無為州人世傑有開國功戰歿贈

永義侯侑享太廟敬以父故陞督府僉事

廖永忠巢人兄四永清永寧永堅永安父旺扈

上渡江不仕永清以子昇贈指揮僉事永寧早卒

永堅仕陳友諒為叅政來歸亦卒永安沒於吳贈

楚國公謚武愍永忠少豪邁有大志智勇過人屯

巢湖來歸上見其年少謂曰汝亦欲圖富貴乎

以水將屬永忠永忠為副歷著大功充征南將軍
 率舟師由海道取兩廣還京上命太子率百官
 迎勞龍灣二年撫定泉漳三年封德慶侯賜世券
 俞通源巢人父廷玉兄通海通淵結寨巢湖自守
 上駐兵和陽歸款時上方欲渡江得廷玉水軍
 甚喜陞廷玉僉樞院事總水軍攻安慶戰趙普勝
 沒追封河間郡公通源屢從征與父兄立功通海

卒通源即軍中領其眾擒張士誠戮張良臣攬王保保戰皆先登洪武三年封南安侯與世券俞通淵以父兄故充參侍舍人節立功上又念通淵父兄功封越雋侯建文元年召通淵為豹韜衛指揮使戰沒白溝河子翊先卒遂無後陸仲亨濠人少負武略壬辰從征歷陞美東衛指揮使江西行省平章政事移鎮襄陽洪武三年封吉安侯十四年鎮成都烏蠻再叛仲亨佐傅將軍討之有功二十三年坐法論死子賢尚五皇女汝寧公主授駙馬都尉時同坐者侯十四人周德興濠人甲午來歸從征有功洪武三年封江夏侯與世券為征西左副將軍入瞿塘討明昇蜀平移江南民十四萬田鳳陽上曰南安侯俞通源關田弗勤遣卿督責尋理軍務德興請決荆州岳山壩通水利得溉田歲增官租四千三百石俄往河南召集故元將佐未幾思州五開諸蠻亂充

征虜將軍討之俘斬四萬二十年

五年秋坐法論死收其公田

郭子興一名興濠人壬辰定遠郭子興所謂滁陽

王者據城稱元帥興隸麾下時上在元帥甥館

專征伐興備宿衛從征有功陞統軍元帥圍常州

晝夜不解衣甲生蟣虱彭蠡之戰海艘駢進賈勇

先登征武昌灑血馳戰佐大將軍取中原守潼關

潼關三秦門戶李思齊張思道日覬覦興厲兵積

貯搯塞慎固屢敗其兵不敢東向洪武

三年封鞏昌侯與世券賜地佃墳戶

朱亮祖六合人元義兵元帥上克寧國擒亮祖

喜其勇悍賜金帛仍舊官復叛歸元上自往督

戰徐將軍奮攻縛亮祖見上詰之對曰生則盡

力死則死爾上壯其言鞭而釋之從軍立功歷

陞元帥從征友諒克九江下南昌江西諸郡大戰

鄱陽湖平武昌洪武三年封永嘉侯巡淮陽移鎮

廣東亮祖在鎮多不法番禺知縣道同聞上

念功臣不下吏罷職令居江寧又坐胡黨十三年卒

吳良定遠人本名國興賜名良氣岸雄偉性質剛直與弟禎俱以勇略稱士誠據姑蘇上移良守江陰命禎與兵協守上勞曰吳院判保障一友使吾無東顧憂賜車馬珠玉不足旌其能命館閣學士宋濂等贈良詩文良在鎮仁勇不妄刑殺儉素自持食不二味聲色貨利泊無所嗜夜宿城樓枕戈警備獎勵名節鼎新學宮崇尚士習絃誦相聞官無囂訟屯田平徭禁惰誥姪居十年封境帖然上屢將兵下江湖廣而東藩竟無擾者皆良捍蔽之功也上移江南民十四萬田鳳陽壯京畿令良與李太師周德興等督田事齊王封青州良營王府十五年卒于青州贈江國公謚襄烈康茂才斬人元末結義兵保鄉里立功至都元帥上渡江時茂才率兵三千來降上喜立拜秦淮翼水軍元帥守龍灣屢有功陞副都護再征漢中卒追封斬國公謚武襄子鐸洪武三年以茂才功封斬春侯與世券

耿炳文濠人父君用取除和積功為管軍總管克采石取金陵丙申與士誠戰賈勇先登死炳文代領其軍明年取廣德長興擒士誠以炳文為總兵都元帥賜鏹鈔造鳳陽葺先塋贈君用為侯鎮守遼東

唐勝宗濠人年十八挺身來歸歷著戰功洪武三年封延安侯與世券移鎮遼東遠壤東界鴨綠北隣曠塞非多算不能守慎勝宗在鎮威讐惠懷兵民輯睦防奸禦侮邊境肅寧吳禎初名國寶賜名禎定遠人江陰侯良弟少卓犖有膽略從上起兵由帳前都先鋒為總管尋為天興右翼副元帥助良守江陰洪武三年封靖海侯與世券禎總舟師數萬由登州轉餉海道險遠預善調度兵食充足召還未幾海上警聞復領沿海兵出靖至琉球大洋獲倭船獻俘自是時往來海道總至軍務數年海上無寇詔出兵定遠疾卒贈海道國公謚襄毅子忠嗣侯堅西安衛鎮撫

胡美沔人初名廷瑞仕友諒為江西行省丞相守南昌遣宣使鄭仁傑詣九江降上至南昌廷瑞迎謁改名美仍故官歷著戰功洪武三年封豫章侯與世券後坐黨事二十六年卒

汪興祖巢人初為張德勝養子德勝戰歿子宣幼興祖嗣職從張姓征友諒與俞通海趙德勝擣水寨鄱陽之戰興祖等六舟深入搏戰又從大將軍北征取山東州縣克元都狗永平下山西收大同時宣已長襲父職興祖乃復姓洪武四年封東勝侯蜀平章丁世真據險距我興祖躍馬直前中飛石死詔興祖沒王事授原封侯爵世券與祖子幼以所賜田五頃令與宣同居後疾卒

謝成濠人累著大功洪武十二年封永平侯巡北邊訓練士卒召還二十七年坐累卒田宅賜汪照陳桓濠人略定遠克滁和渡江取采石太平充副先鋒征雲南克曲靖城烏撒得七星關通畢節進克大理洪武十九年封普定侯與世券

張銓定遠人累戰功歷陞指揮從征雲南有功洪武二十三年封永定侯與世券子嗣指揮使何真東莞人少英偉好書劍元末歷河源縣務副使嶺海騷動弃官歸鄉里率眾保障遂併有循惠二州元授江西分省左丞洪武元年廖將軍率舟師取廣東至福州遣人持書諭何真真詣軍門上印章籍郡縣戶口兵糧奉表降廖將軍送使表詣京師賜詔驛召真遂乘傳入朝授江西行省叅政轉陞山東右布政使十六年致仕十八年遷浙江右布政使明年來朝陞湖廣左又明年致仕封東莞伯二十一年卒子榮嗣

金朝興巢人初結里中少年立誓會俞氏父子廖氏兄弟以舟師來歸帥率眾從上渡江上自將取婺州湖興為奇兵援諸暨太平等郡大戰康郎山截擊焚江口又從征中原定元都征迤北又征西番洪武二年封宣德侯從征雲南建昌至會川卒贈沂國公謚武毅子濶嗣

胡瀚定遠人來歸授百戶從渡江以功充先鋒又
以功陞都先攻廬江戰傷矢刃戰益力上壯
其勇授花鎗上干戶洪武十九年以平

雲南功封東川侯與世參卒子斌立
學士宋文憲公名濂浦江人姓七月而生六歲能
為詩歌稍長文學各益著初為翰林國史編修官
辭入龍門山著書疾子徵至金陵除江南儒學提
舉授太子經壬寅召講春秋左氏傳甲辰改起居
注侍左右公侍上久多所陳說直諫不務文飾
上喜曰朕自布衣為天子卿自草萊列侍從為開
國文臣之首俾世世與國同休不亦美乎上嘗
廷譽公曰古人太上為聖其次為賢為君子若景
濂事朕十九年口無毀言身無飾行寵辱不驚始
終無異不謂君子人乎匪惟君子抑可謂賢矣公
心正身修俯仰無愧尤篤於倫品與人交和易任
真內誠外恕一見信服汲引後學如恐不及平居
布衣蔬食無異貧士自少至老未嘗一時去書致
什居青蘿山閉門纂述人不見其面十三年冬孫

慎坐法論死公罪且不測太子力救得釋安置茂
州十四年五月行至夔卒公墓初在夔永樂十一
年孫恪以蜀獻王命遷葬華陽置祀田正德中謚
文憲濂二子長瓚瓚子三人慎愷恂次璿為中書
名人子三
人憚愠恪

學士王忠文公名禕義烏人幼秀爽奇敏及長長
身山立屹有偉度習古學師事黃潛戊子元政亂
公隱青巖山著書戊戌徵公署中書省掾商略機
務上每稱子克不名間與論文章稱善因命采
故實為四言詩授太子辛丑進平江西頌上覽頌
喜曰吾固知浙東有二儒卿與宋濂耳洪武二年
召修元史為總裁官書成拜翰林兼國史院編修
官三年預教大本堂公經明理達善開道召對殿
廷必賜坐容宴語奉詔論梁王梁王出公與脫
脫相見公顧梁王曰汝朝殺我大兵旦夕
至六年竟被害瘞地藏寺北子紳博學能
文洪武二九年走雲南求父遺骸不得述滇南

勳哭記建

元年紳上言父死節狀贈翰林院學士謚文

六年

翰林學士謚忠文公歿之明年宜

與吳雲

南亦被害謚忠節與公並祠雲南

涉經史

乙未與耆儒李習率父老出城迎上召

語時事

上悅擢為江西參政公寬仁達吏事政

績益著

四年卒疾劇猶草上時務十二事贈姑熟

郡國公

初諸禮多公裁定大祀禮專用公議裕禘

禮定於詹

同齋戒禮朱升五祀禮崔亮朝會禮劉

基視祭禮魏

觀軍禮陶凱

御史中丞

章公名溢龍泉人擢僉營田司事時

上祀社稷

大風雨還坐外朝大怒議禮者得罪且

不測

公曰風雨連朝無足為怪即禮官失議皇

上誠敬

自足昭格願賜寬霽事遂已公巡行江東

兩淮

茗陽賊寇平陽瑞安公集鄉兵令存道合平

瑞兵擒賊

三上章乞終喪得允

補東甌王

東甌湯襄武王各和鳳陽人幼有奇志嬉戲常習

騎射指揮羣兒及長身長七尺個儻饒智畧王辰

卒壯士從滁陽王時上在甥館王委心推翊為

萬夫長攻滁授管軍總管乙未上取和州諸將

多滁陽貴客部曲驕顧望不肯用命王獨恭謹受

約束上定建業王從徐將軍取鎮江陞統兵元

師轉同僉樞密院事十年特進左都督左柱國進

封信國公議軍國事加祿至三千石賜世券十八

年討平五開山獠還朝乞骸骨賜寶鈔造第鳳陽

尋諭王曰日本小更屢擾東海卿雖老強為朕行

視要地築城增戍固守備王行築海上城起登萊

抵江浙凡五十九城民丁四調一為戍兵二十年

元旦京師

疾遣歸里是年召至京歸二十七年

詔與入覲明年卒年七十贈東甌王

謚襄武

發言人問

太廟王沉毅質直勇而善斷不妄

少顧家。臨

輒笑曰。

妾百以

寡無告

贈信世子、輒

知征五開卒、

女妃魯王、

果敢堅忍。未嘗挫。有語及兵書者。

樞心在智識敏遠。何況古為家蓄勝。

皆資遺歸。賞賜多惠。鄉鄰父老及孤。

五人。聘立攻。陞督府。僉事。征雲南。卒。

太原護衛鎮撫。爵燹。早卒。醴督府。同。



